

## Biografia di Mario Andres Reginaldo Steenen (Mayon)

**Mario Andres Reginaldo Steenen** a nace na Aruba dia 19 di januari 1938. Nan ta yam'e Mayon. Su mama yama Lucianita Steenen. Mario a nace den Rancho. Na aña 1949, tempo e tabatin dies aña, nan a bay biba na Dakota. Mario tabatin cinco ruman, cuatro muhe y un homber. E ta e di cuatro ruman. Mario a casa dos biaha. Su ultimo casa a nace na aña 1956 y awor aki e ta bay haci 62 aña. Cu su prome casa, Mario tin un yiu reconoci. Nan tur ta biba na Hulanda awor. Su number ta Sharyn. Su yiu homber ta toca, su yiu muhe ta toca cuatro, pero e no ta toca den ningun grupo. Su yiu homber ta canta rap. Su number ta Mario Mark Anthony y el a nace dia 1 di september 1982.



### Mario a retira di e bida artistico

Mario a stop y retira fo'i tumbafestival. Desde e tempo ey, Mario a stop tur cos tambe cu tin di haber cu canto. Ora bo yega na un edad halto, ya bo n' tin gana di haci esey mas. Mario no ta canta y tin problema cu su wowo pa stuur auto. Asina mes nan ta bin busca Mario, manera ora cu nan tin festival di bolero. E ta contento cu nan ta bin busc'e, pasobra e sa con importante esey ta ora bo ta bay haci bo presentacion.

### E bida artistico

**Segun Mario cu e ta sinti cu e la nace pa ser cantante na su manera.**

**Su cantante favorito ta Ismael Rivera**

Mario a cuminsa canta, esaki ta un storia masha pret mes. E tabatin un bon amigo cu yama Lionel Rumnit y ainda e ta su amigo, pero despues di tempo bo ta aleha poco fo'i otro. Ken no conoce Sonny Yearwood (dfm), kende tambe tabata un gran amigo di Mario. E ta corda cu e tempo aya su ruman muhenan grandi ta cumpra disconan 78. Pareu cu e disconan ta toca, Mario tambe ta canta. E ta gusta cantamento. E ta toca e disconan anto e ta gusta skirbi e letranan. E ta sinti cu el a nace un cantante,

pasobra e no a bay ningun scol di cantamento ni pa siña aregla ni compone. Door di saca letra y scucha melodianan a yud'e si pa canta mas miho. Sonny Yearwood tabatin un banda cu yama Sonora Del Caribe anto Mario su amigo Lionel tabata traha den garashi hunto cu Sonny. Lionel a introduci Mario na Sonny y nan a lag'e haci un test. Mario a bay y tambe un otro persona mas, tambe di Dakota. Nan ta yam'e Chico de Pan. Nan a test nan y nan a scohe Mario, pasobra e tempo ey ya e tabata gusta canta tur cos.

E no kier canta un solo ritmo, bo a comprende. E tabata gusta tur cohunto, e.o. Sonora Matancera y Casino Del Caribe. Den tur e banda- y cantantenan semper te aworaki Mario su cantante faborito, y e ta canta hopi di su cancionnan tambe, ta Ismael Rivera (dfm). Manera Mario ta sinti cu el a nace pa ser un cantante. E no a bay les di musica, ni canto ni di composicion of areglo. P'esey Mario ta bisa tur hende cu e ta sinti cu el a nace pa ser cantante na su manera.

**Door di saca letra y scucha melodia a yuda Mario canta miho**

## Experiencia y dedicacion

Mario su instrumento favorito tabata maraca. E tabata wak e marakero di Sonora Matancera, Cayito, ta haci nomber di tata tocando su maraca. Tur e cosnan ey Mario tambe a siña haci. Tin diferente sorto di maraca manera maracanan di awor di cuero, pero tambe maraca di calbas ta maraca asina grandi. Ultimamente Mario mes a traha su maraca di calbas, dos baran, bala grandi asina. Su prome banda cu el a canta aden yama Sensacion del Caribe. Ey den Mario a siña tur cos. Despues el a


cuminsa desaroya su mes y el a cambia di hopi banda. Segun Mario, pa canta un cantica e ta tuma poco tempo. Si e haya e cantica pa e canta, e ta djis yega cas, skirbi e letranan pasa riba dje dos, tres biaha y bay ensaya cu e banda completo. Mario tabata uza e mata di seida tempo cu e tabata canta hopi. E ta traha un canica lag'e ta herbe y e ta bira manera te, anto e ta lag'e fria y hinc'e den frishider. Esey e tabata hor cune tur biaha prome cu e bay canta.

**Segun Mario pa  
canta un cantica  
e ta tuma poco  
tempo**


## Desaroyo musical

Mario no a bay les, aunke un biaha, Sra. Rhoda Friguerio, a yega di pidi Mario, pa bin cerca dje y e ta perfecciona su bos p'e. Pero Mario no tabatin mucho interes. Mario a pensa cu e lo por perfecciona su mes. E tin cantantenan preferi, manera Alberto Beltran, su cantante favorito tambe ta Daniel Santos. Uno cu nunca el a canta un piesa di dje ta Celio Gonzalez. E tabata gusta canta e boleronan di Bienvenido Grande. Mario su bolero favorito ta "El diez y nueve".

Martin Quandus a aregl'e p'e y Mario a grab'e di nobo. Mario ta gusta bolero, bolero ta su bida. E ta gusta canta salsa, guaracha y chachacha tambe. Naturalmente e ta cantado di tumba tambe. Nan tabata ensaya na cas di Martin Quandus (Marqua) pa tumba festival. Hopi hende ta bin wak, scucha y apoya e cantantenan. Mario su tumbanan semper tabata bon, pero nunca el a logra bay cu e corona di Rey di Tumba, participando hopi aña mes. Prome e tabata canta den Combo Aruba,



cu Chito Croes. Mario a cuminsa canta tumba, Chito Croes tabata compone e tumba. Despues e banda a kibra. Pedro, ruman di Martin Quandus cu ta manager di e cohunto Revolucion Latina, a bin busc'e pa ensaya algun cancion, mientras net e tempo ey, Martin tabata na Colombia pa trato medico. Mario a coy e cos ey hacie den un siman. Ora Martin a bin fo 'i Colombia puntra con a bay, Mario a contesta cu tur cos ta basta bon. "Bo kier sigui canta?" Mario di cu ne: "Compo laga!"



## Participacion cu gruponan musical

Mario a cuminsa cu Sonora del Caribe, despues Ecos del Caribe di Sonny Hoo. Despues Mario a bay cu Combo Aruba. El a forma parti tambe di Revolucion Latina. Mario a graba cu Revolucion Latina na Colombia. Ora Martin a bisa Mario cu nan ta bay graba na Colombia, el a cuminsa hari. Mario kier men ya, ora e wak e avion, e ta kere. E grabacion tabata exitoso! Despues Mario a bay cu Hasham y su combo.



## E parti internacional

Mario a yega di haci presentacion na Medellin, Colombia prome cu grabacion, pa un mucha muhe cu a haci 15 aña. Su tata a pidi nan pa toca p'e. Tambe el a duna presentacion na Corsou.

## Sugerencia

Segun Mario tin hopi herment pa e generacion nobo. Tin hopi bon cantante. Bo ta haya gaynan cu Mario ta mira den nan cu ta bira bon cantante. Por ehempel, Rocco ta canta tumba bon, e ta canta tur cos. Wel unico cos cu Mario por bisa ta, pa nan sigui padilanti loke nan ta haci, pasobra den e tempo moderno aki, compara cu tempo di su tempo, tur cos ta mucho mas facil pa nan. Tempo di Mario su tempo, bo n' ta haya bo cu e sonido pa drecha bo bos. Compronde, bo no ta haya bo cu e cosnan ey, ta abo tin cu canta. Y wak pa e zona bon! P'esey Mario ta kere cu el a siña hopi bon tambe. E ta agradecido pa e bon experiencia y cu e por a aporta na e parti musical y canto pa asina alegra hopi hende na Aruba y den exterior.



Mario gozando su Carnaval